

UNANG ARALIN
SIMULA
NG ISANG
BAGONG BUHAY



Sa Araling Ito'y Pag-aaralan Mo

Ano Ang Nangyari?

Bagong Buhay Kay Cristo

Anong Uri Ng Buhay?

Ano Ang Dapat Mong Gawin?

Ang Iyong Bagong Pamilya: Ang Iyong Ama

**Ang Iyong Bagong Pamilya: Ang Nakatatandang
Kapatid na Lalaki**

**Ang Iyong Bagong Pamilya: Ang Espiritu Santo,
Ang Iyong Katulong**

Ang Iyong Bagong Pamilya: Ibang Mga Cristiano

Ano ang Nangyari

Nang tanggapin mo si Jesu-Cristo bilang iyong Tagapagligtas, ito'y simula na ng isang bagong buhay. Siya ang Tagapagbigay ng buhay-- kahanga-hanga, sagana, at maligayang buhay na dinatapos. Isinuko mo ang iyong buhay na puno ng kasalanan at kabiguan, at pinalitan Niya ng buhay na makapagtatagumpay sa kasalanan. Pina-simulan mo na ang buhay na punong-puno ng mga karapatan bilang anak ng Diyos.

Ang Gagawin Mo

Piliin ang tamang sagot at lagyan ng X sa tabi.

1. Saan galing ang iyong bagong buhay?

- a) sa pagsisikap na maging Cristiano
- b) kay Jesu-Cristo, ang Tagapagbigay ng buhay.
- c) sa pag-anib sa Iglesya

Takpan ang sagot habang sinusulat mo ang iyong sagot.

Sagot: 1. b) kay Jesu-Cristo, and Tagapagbigay ng buhay.

Bagong Buhay Kay Cristo

May bagong buhay ka sapagka't nasa iyo si Jesus. Ang Salita ng Diyos, ang Biblia, ang nagsa-sabi sa iyo nito.

“At ito ang hiwaga: sumainyo si Cristo at dahil dito’y nagkaroon kayo ng pag-asang makapiling ng Diyos doon sa kaluwalhatian.” Colosas 1:27.

Ang mga talata sa aklat na ito ay kinuha mula sa Tagalog Popular Version New Testament at sa unang salin sa Tagalog na Biblia (King James Version). Ang katabing guhit na kulay-abo ay makatutulong sa iyo upang makita mo agad ito. Ang mga reperensiya sa hulihan ng bawa't talata ay magsasabi sa iyo ng katatagpuan nito sa iyong **Biblia.**

Ang Gagawin Mo

Lagyan ng X ang tamang sagot.

2. Saan mo matutuhan na ang bagong buhay ay mula kay Cristo?

----- a) sa Biblia, ang Salita ng Diyos

----- b) sa siyensiya

----- c) sa iba't ibang relihiyon

Sagot: 2. a) sa Biblia, ang Salita ng Diyos.

Anong Uri Ng Buhay?

Nagiging Cristiano ka dahil kay Cristo na nasa iyo. May mga taong nag-aakalang ang buhay Cristiano'y pananatili sa bilangguan at nakaiinip. Nguni't nagkakamali sila: Ang iyong bagong buhay kay Cristo ay higit na masagana, at maligaya kaysa anumang pinangarap mo.

Ang Gagawin Mo

Lagyan ng X ang tamang sagot:

3. Nang tanggapin mo si Jesu-Cristo bilang iyong Tagapagligtas, napasimulan mo ang isang buhay na
- a) malungkot.
 - b) higit na maligaya kaysa dati mong buhay
 - k) parang nakabilanggo.

Sagot: 3. b) higit na maligaya kaysa dati mong na buhay.

“Naparito ako upang ang mga tupa’y magkaroon ng buhay - isang buhay na ganap at kasiya-siya . Juan 10:10

Ang Gagawin Mo

4. Sauluhin ang sinabi ni Jesus sa Juan 10:10.

Lagyan ng X ang tamang sagot.

5. Naparito si Jesu-Cristo upang ikaw'y

----- a) hatulan dahil sa iyong kasalanan

----- b) bigyan ng masaganang buhay.

Sagot: 5. b) bigyan ng masaganang buhay.

Sa bagong buhay na ibinibigay ni Jesus, makasusumpung ka ng bagong kaunawaan, bagong palagay sa buhay, mga bagong hangarin, at bagong layunin sa buhay.

Wala na ang kapighatian ng kasalanan; pina-tawad na ang iyong mga kasalanan. Naguumapaw sa puso mo ang isang bagong pag-ibig sa Diyos at sa kapuwa, kaya't may kapayapaan ka't kagalakan. May bagong pagpapahalaga ka sa mga bagay na mabuti at maganda, at bagong pagkadama sa pakikisama, kapangyarihan, at kabutihan ng Diyos. Ang mga bagong nasaing makalugod sa Diyos at makatulong sa kapuwa'y nagpapasimulang magbigay ng bagong tunguhin sa lahat ng gawain mo.



Higit ang ginawang pagbabago sa iyo ng Espiritu Santo, kaysa sa karanasan ng higad na naging paruparo. Ikaw'y hindi na tulad ng higad, na hinihila ang sarili habang buhay; binago ang iyong katauhan ni Cristo at binigyan ka ng bagwis sa iyong espiritu. Ipinanganak ka nang muli at hindi ka na makasalanan; ikaw ngayo'y anak ng Diyos.

Ang Gagawin Mo

Lagyan ng X ang tamang sagot.

6. Alin sa mga ito ang mapapasa iyong bagong buhay?

----- a) bagong palagay sa buhay

----- b) higit na maraming salapi

----- k) ibayong katanyagan sa mga kaibigan

7. Kapag ikaw'y ipinanganak na muli, nagpapasimula ka ng isang buhay na

----- a) walang mga problema.

----- b) tigib ng pag-ibig sa Diyos at sa kapwa.

----- k) makagagawa ka ng balang maibigan.

Mga Sagot: 6. a) bagong palagay sa buhay

7. b) tigib ng pag-ibig sa Diyos at sa kapwa.

Ano Ang Dapat Mong Gawin?

Bilang bagong-silang na sanggol sa pamilya ng Diyos, mararanasan mo ang magiliw Niyang kalinga. Dapat mo ring tanggapin ang mga inilaan Niya upang manatili kang malusog at malakas. Binigyan ka Niya ng isang bagong kalikasan at ganapin mo ngayon ang iyong bahagi upang mapaunlad ito.

Tutulungan ka ng aklat na ito upang mapaunlad ang iyong bagong kalikasan. Sa pag-aaral mo nito, matututuhan mo ang tungkol sa iyong bagong karapatan at pananagutan bilang anak ng Diyos. Tamasahin mong lubos ito habang narito ka sa lupa. At balang araw, kukunin ka ni Jesus upang pumiling sa Kanya sa tahananang panlangit, na makalilibong higit na kahanga-hanga kaysa anumang bagay sa sanlibutang ito.

Ang Gagawin Mo

Lagyan ng X ang tamang sagot.

8. Tungkol saan ang aklat na ito?

- a) sa iyong buhay bilang kaanib ng iglesya
- b) sa bagong kalikasang ibinigay sa iyo ng Diyos
- k) mga tuntuning dapat sundin ng Cristiano

9 Pinag-aralan mo ang mga araling ito upang ikaw ay

- a) tumanggap ng katibayan.
- b) makatalakay sa relihiyon.
- k) magtamasa ng lahat ng karapatan bilang anak ng Diyos.

Sagot: 8. b) sa bagong kalikasang ibinigay sa iyo ng Diyos.

9. k) magtamasa ng lahat ng karapatan bilang anak ng Diyos.



Ang unang dapat mong gawin ay ang manatiling nakaugnay kay Cristo at magpakatibay sa buhay na ibinibigay Niya.

Manatili kayo sa akin at mananatili ako sa inyo....sapagka't wala kayong magagawa kung kayo'y hiwalay sa akin. Juan 15:4, 5.

Yamang tinanggap ninyo si Cristo Jesus bilang Panginoon, mamuhay kayo sa paraang karapat-dapat sa Kanya. Manatili kayo sa Kanya at isalig sa Kanya ang inyong buhay. Magpakatibay kayo sa pananampalatayang itinuro sa inyo, at laging magpasalamat sa Diyos.

Colosas 2: 6,7.

Ang Gagawin Mo

Lagyan ng X ang tamang sagot.

10. Ano ang pangunahing bagay na dapat mong gawin upang maging malakas na Cristiano?

- a) manatiling nakaugnay kay Cristo
- b) Sikaping tumulad kay Jesus
- k) kumilos tulad ng ibang Cristiano

Sagot: 10. a) manatiling nakaugnay kay Cristo.

Ang Iyong Bagong Pamilya: Ang Iyong Ama

Ang Makapangyarihang Diyos na lumikha ng sandaigdigan ang magiliw mong Ama ngayon. Huwag! mong akalaing Siya'y mahigpit at napakalayo. Nasa tabi mo Siya ngayon, at ibig Niyang tulungan ka sa iyong mga suliranin.

Ngayong ikaw'y anak na ng Diyos, nais ng Diyos na makipag-usap ka nang tapatan, sa Kanya, gaya ng isang anak sa kanyang mabait at maunawaing ama. Isangguni mo sa Kanya sa panalangin ang lahat ng bagay, araw-araw, anumang oras. Sabihin mo sa Kanya ang iyong suliranin. Pasalamatan mo Siya sa mga pagpapalang kaloob Niya. Pinagmamalasakitan ka Niya sa lahat ng bagay na may kinalaman sa iyo.

Hindi na kailangan ang maririkit na pangungusap o isinaulong dasal; sabihin mo lamangang nasa puso mo.

Ang Gagawin Mo

Lagyan ng X ang tamang sagot.

11. Sa bagong buhay na ito, ang Diyos ay
- a) isang katauhang napakalayo.
 - b) isang magiliw na Ama.
12. Ano ang dapat mong gawin kung ikaw'y nananalangin?
- a) isaulo ang mga panalangin at ulit-ulitin
 - b) makipag-usap nang tapatan sa Diyos gaya ng isang anak sa kanyang ama.
 - k) Gumamit ng malalalim na salita at matatayog na pangungusap

Mga Sagot: 11. b) isang magiliw na Ama.
 12. b) makipag-usap nang tapatan sa Diyos gaya ng isang anak sa kanyang ama.

Ang Iyong Bagong Pamilya: Ang Nakatatandang Kapatid na Lalaki

Si Jesu-Cristo ang iyong Nakatatandang Kapatid na Lalaki sa pamilya ng Diyos. Mahal na mahal ka Niya kaya't namatay Siya upang magligtas ka.

Nais Niyang tulungan kang magkaroon ng isang masayang buhay na nakapagtatagumpay sa kasalanan. Pasalamat mo Siya ngayon dahil sa pagliligtas at pagtulong sa iyo sa bawa't araw.

Ang Gagawin Mo

Lagyan ng X ang tamang sagot.

13. Sa bagong buhay na ito, si Jesu-Cristo ay iyong

- a) Tagapagligtas at Nakatatandang Kapatid na Lalaki.
- b) Marahas na hukom.

Sagot: 13. a) Tagapagligtas at Nakatatandang Kapatid na Lalaki.

Ang Iyong Bagong Pamilya: Ang Espiritu Santo, Ang Iyong Katulong

Ang Espiritu Santo, Ikatlong Persona sa Trinidad, and Siyang gumawa sa iyo ng mahiwagang himala ng bagong kapanganakan. Binago Niya ang makasalanan mong pagkatao at ginawa kang anak ng Diyos.

Dapat mo pa ring labanan ang dating pagkatao kung minsan, subali't nananahan sa puso mo ang Espiritu Santo at tutulungan ka. Habang buong pananampalataya at pagsunod kang nakikipagtulungan, ituturo Niya sa iyo ang dapat gawin at bibigyan ka Niya ng lakas upang ito'y magawa.

Ang Gagawin Mo

Lagyan ng X ang tamang sagot.

14. Ang himala ng bagong kapanganakan ay gawa sa iyo ng
- a) ebanghelista.
 - b) pastor.
 - k) Espiritu Santo.
15. Nasa iyo ang Espiritu Santo upang
- a) magparusa sa iyo tuwing magkakamali ka.
 - b) manahanan sa iyo at tutulong upang magawa mo ang tumpak.
16. Iyong gagawin ang nais ipagawa sa iyo ng Diyos
- a) na para kang isang makina.
 - b) sapagka't pipilitin ka ng Espiritu Santo na ito'y gawin
 - k) habang buong pananampalataya at pagsunod kang nakikipagtulungan sa Espiritu Santo.
17. Mauunawaan mo ang nararapat mong gawin at magawa mo sa pamamagitan ng
- a) sarili mong katalinuhan.
 - b) sarili mong kalooban.
 - k) tulong ng Espiritu Santo.

- Mga Sagot: 14. k) Espiritu Santo
15. b) manahanan sa iyo at tutulong upang magawa mo ang tumpak.
16. k) habang buong pananampalataya at pagsunod kang makikipagtulungan sa Espiritu Santo.
17. k) tulong ng Espiritu Santo

Ang Iyong Bagong Pamilya: Ang Ibang Mga Cristiano

Bawa't tunay na Cristiano na ipinanganak na muli ay anak ng Diyos. Ang Diyos ang ating Ama kaya't magkakapatid tayong lahat kay Cristo.

Tinatanggap ka ng lahat ng nakatatandang Cristiano, bilang kapatid. Ibig nilang makatulong sa iyo upang ikaw ay espirituwal na lumago, lumakas, at lumusog na Cristiano.

Kung may suliranin ka, ilapit mo yaon sa iyong pastor at ibang mga kapatid sa iglesya. Idalangin ka nila at gagawin nila ang kanilang makakaya upang matulungan ka.



Ang Gagawin Mo

Lagyan ng X ang tamang sagot:

18. Lahat ng tunay na Cristiano na ipinanganak na muli ay
- a) magkakapatid kay Cristo.
 - b) kaanib ng iisang samahan.
 - k) magkakaibigang matalik.

Sagot: 18. a) magkakapatid kay Cristo.